

## DE CHEMNITZER TURMBESTEICHER

Klaus Irmischer 12/2014

Nu, Harr Richtr, in Chemnitz bei dar stillgeleechtn Fabrik  
Simmr iebn Zaun gestiechn, und dann gab's kee Zerick  
Mir mußtn off denn Turm noff – fimfmdreißch Metr hoch  
Mir hattn eine Aussicht! Abr Höh'angst hatt' mr ooch  
Mr ham de Feuerwehr gerufm – uns schlotttrn de Beene  
„Holt uns von denn Turm! Das bring mr ni alleene!“  
Harr Richtr! Ein Dornröschturm! Mir dachtn: „Nüscht wie nauf!  
's Dornröschn, nu, das weck mr auf!“

### Refrain

Mr wolltn ämal ganz obm sinn  
's war alles so vrwarcht  
Bloß wie mr nachr obm warn  
Da hammr uns gefarcht

!Ähh! Harr Richtr, was hammr denn fr'n Hausfriedn gebrochn?!  
Dort sind doch bloß de Mardr und de Mäuse rumgekrochn  
Nu, da obm, da hat's gepiffm – 's war kalt! Kann'ch lhn'n saachn!  
Nu, endlich kam de Feuerwehr mit neun Einsatzwaachn  
Mit viernzwanzch Mann sind se angerückt  
Wie zwee faule Äppl ham se uns vom Turm gepflückt  
Nu, Harr Richtr, mr hattn vorher dichtch ins Glas geschaut  
Nu, sonst hätt mr uns ni getraut!

!Ähh! Harr Richtr, de Feuerwehr-Rechnung – 's is ja ni ze fassn!  
Nu, das mißt mr doch eichtlich als lebung loofm lassn?  
Turmbesteichr rettn – nu, das is ä wichtches Ding  
Das missn die dichtch iebm, daß se's ooch im Arnstfall bring'!  
Nu, de Fabrik dort – im Dornröschnschlaf untr Denkmalschutz  
Dr Eichndiemr macht nüscht draus – dort bröcklt bloß dr Butz!  
Jetzt steht's Dornröschn in dr Zeidung – nu, und mir ham 's wachgeküßt  
Und dann arläbm mr so änn Mist!

!Ähh! Harr Richtr, das gitt doch ni, daß Se uns vrdonnrn!  
Mr ham doch nüscht vrbrochn, abr 'ch weeiß fr Sie änn annrn:  
Ä Feuerwehrmann hat uns beleidcht – das wird Ihr nächstr Fall!  
Dar Kerl hat doch ze uns gesaacht: „Ihr zwee, ihr habt'n Knall!“  
Mr klettrt um sei Läbm, und 's Fabrik-Dornröschn wird muntr  
Da kommt doch diesr Pfeifnkopp und butzt uns glei so runtr!  
!Ähh! Harr Richtr – Se lachn uns aus?! Nu, da ham Se abr jetzt  
De Würde vom Gericht vrletzt!